



GRAD TUZLA

Budžet za građane

2015.

Zašto „Budžet za građane“



Dragi sugrađani,

Pred vama je prvi „Budžet za građane“ – građanski vodič koji na jednostavan način prikazuje kako će se prikupljati i trošiti novac iz budžeta Grada Tuzla tokom 2015. godine.

Ovo je još jedan pokušaj da budemo otvoreniji i odgovorniji prema građanima u procesima donošenja važnih odluka na lokalnom nivou.

„Budžet za građane“ ima za cilj da javnosti omogući bolji uvid i razumijevanje načina na koji lokalne vlasti planiraju, raspodjeljuju i troše sredstva iz budžeta Grada. S obzirom na to da novac stiže u budžet Grada od poreskih obveznika, naša je obaveza da njime raspolažemo u najboljem interesu zajednice i da građanima predstavimo tačne i razumljive podatke o izvorima prikupljenog novca i njegovom trošenju.

Zato smo željeli da uvažimo mišljenje što većeg broja građana o kreiranju najbitnijeg dokumenta koji donosi lokalna uprava, a koji direktno utiče na živote svih nas na području Grada. Građanski vodič kroz budžet namijenjen je svim građanima koji žele da budu obaviješteni o planovima lokalne samouprave za prikupljanje i trošenje novca i da prate realizaciju postavljenih ciljeva.

Nadamo se da će ovaj dokument, prvi put napravljen u Gradu Tuzla i u dogovoru sa građanima, objasniti ključna pitanja i tako učiniti budžet pristupačnjim i razumljivim.

Očekujem da ćete se i u narednim godinama više uključivati u budžetski proces, što će doprinijeti novom kvalitetu upravljanja lokalnom zajednicom.

Budžet za građane



Novac kojim na osnovu svojih **budžeta** raspolažu institucije vlasti na svim nivoima je novac građana. Prihodi vlasti dolaze od građana kroz poreze (na prodaju roba i usluga, dohodak, plate, imovinu...) i plaćanje raznih taksi i naknada. Pored ovoga, prihodi dolaze od **koncesija** za iskorištavanje prirodnih resursa koji su dio nacionalne baštine pa pripadaju svim građanima. Čak i kada prihodi dolaze od kredita, građani su ti koji će ih morati otplatiti na kraju. Institucije vlasti su odgovorne za sredstva u okviru budžeta, te odlučuju u ime građana o raspodjeli prikupljenih sredstava.

Imajući u vidu da je budžet i odraz lokalnih **javnih politika**, jasno je zbog čega u zemljama s razvijenom demokratskom kulturom postoji značajan interes javnosti za mnoga pitanja koja se tiču budžeta. Građani žele da znaju i odlučuju o tome kako će se trošiti njihov novac. Dakle, informisanost je osnovni preduslov za učešće građana u procesu odlučivanja o budžetu. U skladu s tim, zadatak organa lokalne samouprave (općine ili grada) jeste da obezbijedi javnost rada i pruži informacije o svim bitnim pitanjima u procesu kreiranja, usvajanja i izvršenja budžeta.

Budžet za građane je dokument koji sažima i pojašnjava osnovne informacije iz budžeta. To je izveštaj za građane, predstavljen u pristupačnom formatu, koristi jednostavan i jasan jezik koji oni mogu razumjeti. Ako su u stanju da razumiju, građani onda mogu ostvarivati svoja građanska prava u demokratiji – oni mogu postavljati pitanja koja osiguravaju da vlast objašnjava ono šta radi u njihovo ime.

Budžet je akt kojim se predviđaju svi prihodi i rashodi u jednoj budžetskoj godini.

Koncesija – Odobrenje nadležnog organa koje se daje fizičkim ili pravnim licima za obavljanje određene djelatnosti ili korištenje određenih resursa, u skladu sa propisanim uslovima.

Javne politike – Plan ili smjer djelovanja vlasti.

Budžet za građane je pojednostavljen i ilustrativan prikaz određenih dijelova gradskog budžeta.

Treba napomenuti da je sadržaj ovog dokumenta pripremljen u potpunosti uz učešće velikog broja građana Grada Tuzla. Tokom pripreme samog dokumenta izvršene su brojne individualne i grupne konsultacije sa građanima, predstavnicima savjeta mjesnih zajednica, te predstavnicima nevladinih organizacija.

„Budžet za građane“ Grada Tuzla nastao je u okviru projekta *Budžet za građane* koji provodi Razvojna agencija *Eda*, a finansira Fond otvoreno društvo BiH. Osnovni cilj projekta je promovisanje i iniciranje uvođenja inicijative građanskog budžeta u jedinicama lokalne samouprave u Bosni i Hercegovini, stvaranjem oglednih primjera kojima bi se podstakli i lokalni i drugi nivoi vlasti na prihvatanje i uvođenje ove inicijative. Projekat se tokom 2014. godine realizovao u gradovima Bijeljina, Tuzla i Zenica.

Ko finansira pojedine nadležnosti?

Grad Tuzla, kao jedinica lokalne samouprave u Federaciji BiH, obavlja poslove iz samostalne nadležnosti i poslove koji su mu preneseni posebnim zakonima. Stoga je veoma bitno pojasniti ko finansira određene nadležnosti i poslove, a koji od njih se vrše na lokalnom nivou. (Tabela 1)




Tabela 1.: Finansiranje nadležnosti (zakonska obaveza i fakultativno finansiranje, u skladu sa opredjeljenjem lokalne politike).

	Potpuno finansira Grad	Uglavnom finansira Grad	U manjoj mjeri finansira Grad	Ne finansira Grad
Učešće Grada u finansiranju				
Obrazovanje			x	
Opća uprava (matični ured, reg. birača, javna uprava, civilna zaštita...)	x			
Zdravstvena zaštita			x	
Socijalna zaštita			x	
Kultura		x		
Urbanizam, prostorno uređenje, stambena politika	x			
Komunalne i druge javne uslužne djelatnosti	x			
Zaštita okoline		x		
Saobraćaj – transport				x
Privreda (poljoprivreda, trgovina, zanatstvo, šumarstvo, ugostiteljstvo...)			x	

Kako teče budžetski proces?

Budžetski proces –
Proces koji obuhvata sve korake pri kreiranju i usvajanju budžeta.

Budžetski proces se zasniva na analizi ostvarenja prihoda u proteklom periodu, procjenama **ekonomske osnove**, prioritetnim ciljevima i poslovima iz nadležnosti Grada, planiranim projektima i programima. Donošenje budžeta Grada propisano je Zakonom o budžetima FBiH, kojim su utvrđeni postupci/koraci i krajnji rokovi u pripremanju, izradi i usvajanju budžeta.

Aktivnosti započinju u junu mjesecu, pripremom i analizom **DOB-a** za Grad Tuzlu, te slanjem Uputstva za izradu budžeta budžetskim korisnicima. Na osnovu budžetskih zahtjeva korisnika budžeta Grada, Odjel za finansije vrši usaglašavanja i pristupa izradi Nacrtu budžeta, zatim pribavlja mišljenje i preporuke Ministarstva finansija. Nacrt utvrđuje Gradsko vijeće nakon čega slijede javne rasprave o Nacrtu. Poslije provedenih javnih rasprava i pribavljene saglasnosti Ministarstva, Gradsko vijeće razmatra i usvaja definisani Prijedlog budžeta. Usvojena budžetska dokumenta se objavljaju i dostavljaju Ministarstvu finansija. Aktivnosti za donošenje budžeta traju do 31. decembra tekuće godine.

U narednoj godini planirani budžetski okvir se realizuje, a raspoloživa sredstva se troše prema utvrđenim namjenama i planu, o čemu se kvartalno izvještava Gradsko vijeće. Ostvarenje budžeta se analizira, nadzire i prati, a u slučaju odstupanja vrše se izmjene budžeta po istoj proceduri. Nadležni organi vrše kontrolu i reviziju izvršenja budžeta i izvještavanja. Slijedi grafički prikaz budžetskog ciklusa.

Ekonomска osnova –
Materijalna dobra koja omogućavaju društvenu i individualnu egzistenciju čovjeka.

DOB –
Dokument okvirnog budžeta je akt koji sadrži makroekonom-ske projekcije i prognoze priliva i odliva budžet-skih sredstava za naredne tri go-dine, a na kom se zasniva priprema i izrada godišnjeg budžeta.

Grafikon 2: Budžetski ciklus sa naglaskom na mjesece kada se građani mogu uključiti (polja označena crvenim) i kako to mogu da učine.



Opći (makroekonomski) okvir za donošenje budžeta

Obilježje prethodnih godina su nestabilnost makroekonomskog okruženja, ali se, prema podacima iz prvog kvartala 2014. godine, očekivao blagi porast privredne

Fiskalni prihodi –
Prihodi od poreza.

Bruto društveni proizvod –
Mjera za ukupnu proizvodnju dobara i usluga jednog društva.

Indirektni porezi –
Uvozne i izvozne carine, akcize, porez na dodatnu vrijednost i sve druge poreze obračunate na robu i usluge, uključujući poreze na promet i putarine.

Makroekonomski okvir – Odnosi se na funkcionisanje i upravljanje ekonomijom u cjelini većoj od lokalnog i državnog nivoa.

aktivnosti uz oporavak ekonomije. Ispunjene takvih očekivanja bi se svakako reflektovalo na blagu stabilizaciju javnih finansija uz više **fiskalnih prihoda** za sve nivoe vlasti. Međutim, pozitivni trend iz prvog kvartala je zaustavljen zbog situacije koju su prouzrokovale katastrofalne poplave i ogromnih šteta na velikom broju infrastrukturnih i stambenih objekata, kao i poljoprivrednom i drugom zemljištu u cijeloj regiji. Prema prvim pokazateljima, poplave su nanijele direktnu štetu u iznosu od 15% godišnjeg **bruto društvenog proizvoda** (BDP), dok se indirektna šteta teško može i izračunati. Stoga se u 2015. godini ne može očekivati značajniji napredak u stabilizaciji fiskalnih prihoda i javnih finansija.

U Federaciji Bosne i Hercegovine, javni prihodi po osnovu poreza, taksi, naknada, doprinosa i drugih prihoda ostvaruju se, prikupljaju i raspoređuju prema važećim propisima na teritoriji Federacije Bosne i Hercegovine, a služe za finansiranje funkcija Federacije, kantona, jedinica lokalne samouprave i direkcija cesta. U 2015. godini se očekuje blagi porast prihoda od **indirektnih poreza**, poreza na dohodak i poreza na dobit.

Nešto značajniji porast se očekuje kod neporeskih prihoda, te **grantova** za podršku budžetima od strane međunarodnih institucija. Karakteristična je i činjenica da se prilikom pripreme i usvajanja budžeta na svim nivoima vlasti, posebna pažnja mora posvetiti povećanju iznosa sredstava namijenjenih za otplate unutrašnjeg i vanjskog duga, što



Grantovi – Predstavljaju specifične izvore finansiranja, koje dodjeljuju međunarodne organizacije, državne institucije..., a namijenjeni su, prije svega, preduzećima, NVO, školama, općinama, bolnicama i svim drugim institucijama, odnosno pravnim i fizičkim licima kojima je potreban dodatni izvor finansiranja.


predstavlja dodatno opterećenje za provođenje mjera fiskalne stabilizacije i zacrtanih strateških ciljeva.

Napominjemo da se Budžet Grada Tuzla u potpunosti oslanja na ove makroekonomski pokazatelje i projekcije imajući u vidu propise na osnovu kojih se vrši raspodjela određenih poreskih i neporeskih prihoda. Za skoro većinu poreskih i neporeskih prihoda su definisana pravila njihove raspodjele za određene nivoе vlasti (država–entitet–kanton–grad/općina).


Kako se puni budžet

Grada Tuzla?

PRIHODI



Prihodi od poreza
48,47%



Ukupna sredstva budžeta Grada, koja su planirana za 2015. godinu iznose 47.043.238 KM.

Budući da se nastavlja ekomska kriza, pojedini budžetski prihodi padaju, što uslovljava planiranje budžeta u prethodno definisanom okviru. U skladu sa propisanim kriterijumima raspodjele, prihodi po osnovu PDV-a za Tuzlu se neće smanjivati već je projektovan njihov blagi rast.

Budžet Grada Tuzle se najviše puni iz prihoda koji se dijele između lokalnog i viših nivoa vlasti (PDV-a, poreza na dohodak, te određenih naknada i **transfera**), a koji čine više od 50% budžeta. **Na ove prihode lokalna zajednica ne može uticati.**

Prihod koji se u 2015. godini prvi put pojavljuje u Budžetu Grada Tuzla su sredstva od naknade ostvarene radom Termoelektrane u iznosu od pet miliona KM. Naime, Zakon o izdvajaju i usmjeravanju dijela prihoda preduzeća ostvarenih radom Termoelektrana (Službene novine FBiH, broj: 80/14) obavezuje javna preduzeća i druga pravna lica koja ostvaruju prihod radom termoelektrana da jedinicama lokalne samouprave u FBiH plaćaju novčane naknade za prostore na kojima su izgrađene termoelektrane ili na kojima se nalaze instalacije za proizvodnju električne energije, odlagališta šljake, pepela i sličnog otpada nastalog radom termoelektrana, te deponije uglja.

Sredstva od naknade za prihode ostvarene radom termoelektrana koriste se namjenski za poboljšanje životnih uslova građana, a naročito za:

- finansiranje ili učešće u finansiranju projekata iz oblasti zaštite okoliša, energetske efikasnosti i sl.
- izgradnju komunalnih infrastrukturnih objekata, kao i gradnju objekata za poboljšanje zdravlja i kvaliteta života (vodovod, kanalizacija, centralno grijanje, lokalni putevi, zdravstveni objekti i oprema i sl.), te
- finansiranje projekata za lokalni ekonomski razvoj.

Oko 2% od ukupnih prihoda ili 930.000 KM se odnosi na sredstva za otklanjanje prirodne nesreće i obnovu područja zahvaćenih prirodnom nesrećom, koja se doznačavaju sa viših nivoa vlasti s ciljem sanacije katastrofalnih poplava iz maja 2014. godine.


Transfer –
Doznaka sredstava sa jednog na drugi račun, najčešće sa jednog na drugi nivo vlasti, ili sa jednog na drugog budžetskog korisnika.

Gdje se raspoređuje budžetski novac ?


Javna potrošnja –
To su svi izdaci Grada u najširem smislu, za obavljanje zakonom predviđenih funkcija.

Prioriteti u potrošnji za 2015. godinu su: **javna potrošnja**, otplata po osnovu zaduženja, stambeno-komunalni poslovi, te **kapitalni izdaci** za koje su strateškim dokumentima utvrđeni prioriteti finansiranja i dr.

RASHODI



Kapitalni izdaci –
Izdaci za nabavku imovine čiji je vijek duži od jedne godine.
Na primjer: za izgradnju rasvjete, cjevovoda, kanalizacije, rekonstrukciju doma zdravlja, gradskog stadiona, poslovne zone itd.



Tekući rashodi –
Troškovi bez kojih Grad ne bi mogao da funkcioniše. Oni se odnose na interno ili administrativno poslovanje. Na primjer: plate, komunalije, potrošni materijal, prevoz, popravke...

Budžetska rezerva
– Novčana sredstva koja se u budžetu izdvajaju za hitne i neplaniране situacije.

Kada posmatramo strukturu budžetske potrošnje, vidljivo je da se u 2015. godini najviše sredstava namjerava izdvojiti za **tekuće rashode** i to 72,74% od ukupno predviđenih rashoda. Za kapitalne izdatke je predviđeno 22,79% od ukupno predviđenih rashoda, dok se za otplate kredita namjerava izdvojiti 1,66% rashoda za 2015. godinu. Tekuća **budžetska rezerva** iznosi 0,38% predviđenih rashoda. U okviru tekuće potrošnje, značajni izdaci se odnose na lična primanja za zaposlene u Gradskoj upravi i drugim gradskim institucijama i organizacijama, te izdaci za robe i usluge koji su neophodni za normalno funkcionisanje i nabavku neophodnog materijala. Predviđeno je izdvajanje od 4.867.488 KM u vidu tekućih grantova.

Kao i prethodnih godina, najviše sredstava se planira potrošiti u komunalnu oblast i oblast društvenih djelatnosti. Za izdatke kojim se finansiraju nadležnosti ove dvije službe u Budžetu za 2015.godinu, planiraju se sredstva u iznosu od 28.909.558,61 KM ili 63,29 % ukupno planiranih rashoda. Od toga iz budžetskih sredstava finansiraju se izdaci u iznosu od 22.147.590,00 KM, dok se iz vlastitih prihoda rashodi finansiraju u iznosu od 6.761.968,61 KM.

Struktura potrošnje se može posmatrati i po oblastima tj. namjeni/funkciji utroška predviđenih sredstava.




Koliko smo zaduženi?


Prethodnih godina, u cilju realizacije kapitalnih projekata korišteni su tuđi izvori po osnovu kredita. Zaduženje generalno nije visoko te je u granicama zakonskog limita. Procjena stanja zaduženosti Grada na dan 31.12.2014. iznosi 4.824.412,47 KM.


Glavnica –
Osnovni (pozajmljen) iznos koji je dužnik dužan povjeriocu i na koji se najčešće obračunava kamata.

Na narednim grafikonima su predstavljeni prihodi i rashodi Grada Tuzla u odnosu na stepen zaduženosti (preostalu **glavnici zajma**).



Treba napomenuti i činjenicu da se obaveze za preuzeta zaduženja uredno servisiraju, te da se u 2015. godini očekuje otplata 613.666,00 KM po osnovu glavnice preostalih zajmova. Ne očekuje se dodatno zaduživanje u toku 2015. godine.





Predviđena sredstva za kapitalne projekte (komunalne)infrastrukture

U 2015. godini je predviđeno izdvajanje od 8.896.900 KM za kapitalne projekte komunalne infrastrukture. Od ukupnog iznosa, 62,57% sredstava se namjerava utrošiti za realizaciju projekata u ruralnim mjesnim zajednicama dok se ostatak od 37,43% odnosi na projekte u urbanim mjesnim zajednicama.



Kapitalni projekti
– Projekti izgradnje i kapitalnog održavanja zgrada i građevinskih objekata infrastrukture od interesa za lokalnu zajednicu, uključujući usluge projektnog planiranja koje su sastavni dio projekta, obezbeđivanje zemljišta za izgradnju, kao i projekti koji podrazumijevaju ulaganja u opremu, mašine i drugu nefinansijsku imovinu, a u funkciji su javnog interesa.

Prema Nacrtu budžeta Grada Tuzla za 2015. godinu, pet najvećih kapitalnih projekata komunalne infrastrukture odnose se na: izgradnju vrelovodne mreže i optimizaciju sistema daljinskog grijanja, izgradnju i rekonstrukciju puteva, izgradnju vodovodne i kanalizacione mreže i objekata vodosnabdijevanja, izgradnju mostova-pasarela, te izgradnju i rekonstrukciju stadiona Tušanj.


	Urbane MZ	Ruralne MZ	Ukupno
Izgradnja vrelovodne mreže, optimizacija sistema daljinskog grijanja	1.277.200	2.846.800	4.124.000
Izgradnja i rekonstrukcija puteva	1.050.000	1.400.000	2.450.000
Izgradnja vodovodne i kanalizacione mreže i objekata vodosnabdijevanja	30.000	970.000	1.000.000
Izgradnja mostova-pasarela	350.000	50.000	400.000
Izgradnja i rekonstrukcija stadiona Tušanj	322.900	0	322.900
Ostali projekti (oprema, javna rasvjeta, semafori, itd.)	300.000	300.000	600.000
Ukupno	3.330.100	5.566.800	8.896.900

U Budžet Grada Tuzla za 2015. godinu nisu uvrštena sredstva po sljedećim projektima, a kojima će se sufinansirati izgradnja komunalne infrastrukture:

- Projekat vodosnabdijevanja i sanacije u BiH II, koji finansira SDC, SECO i KfW. Ukupna vrijednost projekta je oko 25 miliona KM, a realizovati će se u naredne četiri godine;
- Projekat Svjetske banke. Ukupna vrijednost oko 2.020.000 KM, a projekti će se finansirati preko računa PIU Federalnog ministarstva;
- Projekti finansirani sredstvima vodnih naknada, ukupne vrijednosti 1.321.475,03 KM.



Izdvajanja u oblasti poljoprivrede



U sljedećoj tabeli su sumirana budžetska izdvajanja za poljoprivrednu proizvodnju u protekle 4 godine, zajedno sa brojem korisnika ovih sredstava.


Oblik podrške	Iznos podrške za 2011.	Iznos podrške za 2012.	Iznos podrške za 2013.	Planirani iznos podrške za 2014 *
Stočarstvo	37.592 KM za 268 korisnika	33.540,10 KM za 206 korisnika	20.206 KM za 145 korisnika	25.335 KM za 167 korisnika
Ratarstvo	17.063 KM za 60 korisnika	16.458 KM za 70 korisnika	9.000 KM za 53 korisnika	11.250 KM za 100 korisnika
Voćarstvo	6.600 KM za 11 korisnika	8.200 KM za 10 korisnika	6.400 KM za 10 korisnika	8.000 KM za 62 korisnika
Plastenička proizvodnja	24.120 KM za 103 korisnika	28.706,60 KM za 107 korisnika	23.530 KM za 110 korisnika	21.600 KM za 111 korisnika
Promocija domaće poljoprivredne proizvodnje i domaćih proizvoda	1.500 KM za 60 korisnika	4.860 KM za 60 korisnika	2.300 KM za 60 korisnika	2.800 KM



* Što se tiče 2014. godine, aktivnosti iz programa korištenja sredstava iz granta za podršku poljoprivrednoj proizvodnji i kapitalnog granta još uvijek su u toku i plan je da se realizuju do kraja godine. U ovoj godini podrška za poljoprivredne proizvođače razdvojila se na dva granta – tekući i kapitalni grant za podršku poljoprivrednoj proizvodnji.

U 2015. godini je predviđena budžetska podrška u iznosu od 150.000 KM. Pored izdvajanja sredstava za različite oblike direktnе podrške, postoje i izdvajanja za edukacije i informisanje poljoprivrednih proizvođača, koje se rade kontinuirano.


IZDVAJANJE SREDSTAVA PO GODINAMA ZA POLJOPRIVREDU



Izdvajanja u oblasti komunalnog sektora i gradske putne infrastrukture

Za tekuće održavanje u oblasti komunalnog sektora, uključujući zaštitu životne sredine prema zakonskim obavezama, planirano je da se potroši 4.214.000 KM. Struktura izdvajanja za tekuće održavanje u ovoj oblasti se vidi na sljedećoj slici.






Najveći izdaci se odnose na utrošak električne energije za javnu rasvjetu i to čak 1.650.000 KM. Za održavanje higijene je predviđeno 900.000 KM dok je za tekuće održavanje puteva planirano 870.000 KM. Značajna su i izdavanja za održavanje zelenih površina (400.000 KM) i rad zimske službe (300.000 KM).

Izdvajanja u oblasti sporta


Za aktivnosti u oblasti sporta predviđeno je 774.000 KM, odnosno 1,69 ukupnih sredstava Budžeta za 2015.



Izdvajanja u oblasti obrazovanja

Ovdje se prvenstveno posmatra izdvajanje u oblasti predškolskog obrazovanje za rad Javne ustanove „Naše dijete“.

U Nacrtu budžeta za 2015. godinu ova izdavanja iznose ukupno 2.788.800,00 KM, od čega 1.180.000,00 KM iz budžetskih sredstava, i 1.608.800,00 KM iz vlastitih prihoda, a koje ostvaruje JU Obdanište „Naše dijete“ Tuzla po osnovu cijene boravka djece predškolskog uzrasta u ovoj ustanovi. Izdvajanje za predškolsko obrazovanje predstavlja 6,11% od ukupnih budžetskih rashoda.




Izdvajanja u oblasti socijalne zaštite


Pružanje pomoći socijalno ugroženom stanovništvu Grada Tuzla vrši se putem dodjele jednokratnih pomoći građanima koji se nalaze u teškoj socijalnoj situaciji i dodjele jednokratnih pomoći korisnicima boračko – invalidske zaštite, a u skladu sa pravilima utvrđenim od strane Gradskog vijeća Tuzla.

Značajna pomoć ovim osobama pruža se i indirektno putem finansiranja aktivnosti Narodne kuhinje „Imaret“, OO Crveni krst – križ Tuzla, Udruženja penzionera Grada Tuzla i udruženja iz oblasti boračko – invalidske zaštite.

Za ove namjene u Budžetu 2015. godine, planiraju se sredstva u iznosu od 1.349.300,00 KM. Ova sredstva rasporedit će se na sljedeći način:



Za finansiranje rada Savjeta mjesnih zajednica planiraju se sredstva u iznosu od 490.000 KM dok su za rad parlamentarnih grupa – klubova vijećnika u Gradskom vijeću predviđena – sredstva u iznosu od 400.000 KM.



Rashodi za plaće i troškove lokalne administracije

U okviru budžetske potrošnje značajno učešće imaju plaće (bruto plaće i doprinosi) uposlenih u Gradu Tuzla i uposlenih u javnim ustanovama (eksternim budžetskim korisnicima). U 2015. godini je predviđeno izdvajanje u iznosu od 10.463.300 KM za plaće uposlenih u Gradu Tuzla, te 3.062.560 KM za plaće uposlenih u javnim ustanovama. Istovremeno, za funkcionisanje Gradskog vijeća u Nacrtu budžeta za 2015. godinu predviđena su sredstva u iznosu od 775.500 KM.



Budžet za građane Grada Tuzla je pojednostavljeni i ilustrovani prikaz određenih dijelova dokumenta Budžet Grada Tuzla.

Ovaj jednostavni i ilustrativni izvještaj omogućit će vam da razumijete kako gradska vlast za vas i u vaše ime troši novac.

Pogledajte i pitajte nas!

Podaci za kontakt sa građanima:

SLUŽBA ZA BUDŽET I FINANSIJE

Šef Službe: Suada Isaković, dipl. ecc.

Zemira Mujanović, dipl. ecc.

Nedim Naimkadić, dipl. ing. saobraćaja

Brojevi telefona: 035 307 360 i 307 340

suadai@tuzla.ba, budzet_opcinatz@tuzla.ba

Budžet za građane Grada Tuzla:

www.tuzla.ba/Pages/Page.aspx?pID=3Rs1Yajxs3VPkOKMPSSrhQ==&title=le=Bud%C5%BEet%20za%20gra%C4%91ane

Budžet Grada Tuzla:

<http://tuzla.ba/Pages/Page.aspx?pID=1+oSDQg+wkPslMwnRAkLpw==&title=Slu%C5%BEba%20za%20bud%C5%BEet%20i%20finansije>



Open
Society Fund
Bosnia & Herzegovina

